

山西通志卷第九十九

山西巡撫都察院右副都御史臣覺羅石麟奉

旨修輯

名宦十七

保德州

宋

鄭文寶字仲賢太平興國八年進士咸平中任河東轉運使
嘗上言管內廣銳兵萬餘難得資糧請徙置近南諸州又
欲使強壯戶市馬備征役宰相李沆等言不便復令文寶
條對文寶執前議且言土人久留恐或生事議卒罷先是
麟府屯重兵皆河東輸饋雖地里甚邇而限河津之阻土
人利於河東民罕至則芻粟增價上常訪使邊者言河裁

濶數十步乃詔文寶於府州定羗軍經度置浮橋人以爲
便會繼遷圍麟州令乘傳晨夜赴之圍解遷刑部員外郎
賜金紫景德元年冬遼人犯邊又徙河東文寶安集所部
募鄉兵張邊備又領番漢兵赴河北手詔褒諭後以兵部
員外郎卒

張亢字公壽臨濮人第進士仁宗時夏人自後河川襲府州
縱遊騎抄麟府間時豐州已破麟府勢孤朝廷議棄河外
守保德軍未果以亢爲并代都鈐轄管勾麟府軍馬事州
東焦山有石炭穴亢築東勝堡下城旁有蔬畦築金城堡
州北沙院有水泉築安定堡置兵以守遂襲擊琉璃堡大
破之夏人棄堡去乃築宣威砦擇寇又敗賊於栢子砦斬
六百餘級乃修建寧砦夏人數出爭遂戰於兔毛川敵大

潰斬二千級不踰月築清塞百勝中候建寧鎮川五堡麟
府路始通亢復奏請增並邊諸柵以相維持則可以廣田
牧壯河外之勢議未下徙并代副都總管御史梁堅劾亢
出庫銀給牙吏往成都市易奪引進使爲本路鈐轄及夏
人與遼戰河外復引進使副都總管知代州兼河東沿邊
安撫事范仲淹宣撫河東復奏亢前所增廣堡砦宜使就
其事詔旣下明鎬以爲不可屢牒止之亢曰受詔置堡砦
豈可得經畧牒而止耶坐違節度死所甘心堡砦必爲也
每得牒置案上督役愈急及成乃發封自劾朝廷置不問
蕃漢歸者數千戶歲減戍兵萬人河外遂爲并汾屏蔽徙
知瀛州後陝西轉運使言亢所易庫銀非自入者累遷徐
州總管卒亢好施輕財凡燕犒饋遺類皆過厚至遣人買

易助其費猶不足以此人樂爲之用馭軍嚴明所至有風蹟民圖像祠之

高繼宣瓊次子善騎射知讀書康定中授恩州團練使知并州初元昊叛聲言侵關隴繼宣請備麟府未幾羗兵果入寇河外陷豐州乃命涖并賊俄寇麟府繼宣率兵營陵井抵天門關是夕大雨及河師半濟黑凌暴合舟不得進乃具牲酒爲文以禱已而凌解師濟進屯府谷敗賊于三松嶺築寧遠砦相視地脉鑿石出泉又城五砦遷眉州防禦使卒

高渙廣陵人熙寧間授朝散大夫知保德軍創建文廟於南坡

孔文仲字經父臨江新喻人舉進士南省第一制舉封廣

千書新法不便罷通判保德軍時征西夏衆數十萬並道境上人不解邊人厭苦文仲陳三不便曰大兵未出而丁夫預集河東雇夫勞民而損費諸路出兵首尾不相應虞夏商周之盛未嘗無外侮然懷柔制禦之要不在彼而在此也元祐初召入仕至中書舍人卒蘇軾歎曰世方嘉軟熟而惡崢嶸求勁直如吾經父者今無有矣

徐徽言字彥猷衢州西安人負氣豪舉喜談功名事大觀二年賜武舉絕倫及第歷保德軍監押以邊功加闔門祗候平陽府軍馬鈐轄權知保德軍政總領河西軍馬宣和四年定天德雲內兩城宣撫使童貫嫉其功復棄去改知火山軍兼統制河西軍馬徙赴石州靖康初遷武翼郎閤門宣贊舍人金圍太原分兵絕饒道自隰石以北命令不通

者累月徽言以三千人渡河一戰破之遷武經郎知晉寧軍兼嵐石路沿邊安撫使聶昌出河東爲金人所刼以便宜割河西三州隸西夏徽言率兵復取三州并取嵐石等州教戈船卒乘羊皮渾脫亂流以掩敵金人益備克胡砦吳堡津遣守領爲九州都統與晉寧對壘徽言出奇兵襲逐之時河東郡縣淪沒遺民日候大軍至徽言陰結汾晉土豪數十萬約復故地則奏官爲守長聽世襲條其事以聞候報可卽身率精甲擣太原徑取雁門留兵戍守且曰定全晉則形勝爲我有中原當指期克復投機一時會不可失奏上詔徽言聽王庶節制議遂格建炎二年冬金自蒲津涉河圍之時環河東皆陷獨晉寧屹然孤墉橫當強寇徽言遣没人汭河召逃民幾萬衆浮筏渡與金人

上大小數十戰後裨校啟外郭納金兵徽言與太原路兵
馬都監孫昂決戰鬥中格殺甚衆退嬰牙城金兵挾以去
不屈死之初徽言與劉光世束髮雅故光世被命援太原
次吳堡津輒頓不進徽言移書趣行不聽又諭以太原旦
暮望救總管承詔赴急不宜稽遲取方命罪光世猶前卻
徽言卽露章劾其逗撓封副與之光世惶遽引道至是死
節事聞贈晉州觀察使諡忠壯

何灌字仲源開封祥符人武選登第爲河東從事經畧使韓
績雖數試其才而常沮抑之不假借人方語之曰君奇士
也他日當據吾坐爲府州火山軍巡檢盜蘇延福狡悍爲
二邊患灌親梟其首嘗申畫賈胡曠泉界遠人舉兵灌發
輒中或著巖石皆沒鏃敵歛去爲河東將與夏人遇鐵騎

來追灌射皆徹甲至洞胸出背疊貫後騎羌懼而引却知
寧化軍豐州徙熙河又提點河東刑獄及梁方平守黎陽
拜灌武泰軍節度使河東河北制置副使靖康元年正月
方平奔灌師遂潰戰没于汴城西

遼

耶律侯哂初爲西南巡邊官以廉潔稱重熙十一年党項部
人多叛入西夏侯哂受詔巡西邊沿河要地多建城堡以
鎮之後致仕卒

金

高懷貞廣陵人大定元年授朝散大夫知保德軍上騎都尉
開國子食邑五百戶賜紫金魚袋改建文廟於城內西北

隅

李晏隴西人由進士於大定間授少中大夫知保德軍事輕車都尉修城便汲政平訟理盜賊屏息人以古治渤海目之

張令臣博平人泰和元年授奉議大夫知保德軍提督常平倉事上騎都尉開國子食邑五百戶賜紫金魚袋重修文廟殿宇兩廡垣墉補缺像正位次起講堂齋舍庖厨等類有碑記

元

吳公失名汴梁人至正間以廣平等處兵農宣慰使司都元帥樞密院討賊至武州興縣兵亂來侵保德公征退明年府谷縣軍侵河曲保德公至河曲委院判袁公守保德河西兵退州以安凡袁公爲民請命悉慨允又明年請於朝

除袁公知是州民心悅服

袁公失名光州人至正十三年府谷官軍作亂公承上官命撫禦之定羗之民獲有寧宇明年授知州凡有糧儲科役造作必躬詣樞府請省減才畧明敏耆士爲建坊監碑記之

許仲傑字漢臣長清人至正十三年由毗陵推官以廉能擢知保德州捐俸修州治兼置供奉上官器具及甃砌儒學垣基有碑記

明

蘭普整府谷人洪武間知保德州創立之始治績居多

宋鎮永樂間知保德州存心公正蒞政勤能撫字有方士民

頌德

任秦陝西咸寧人宣德間任保德州知州廉直無私遇事立
決雖當艱大無少滯人推公敏祀名宦

陸鏞江南崑山人天順間以進士任保德州知州性溫厚尚
德化誠能格物嘗遇旱禱雨立應擢工部郎祀名宦

李邦彥直隸薊州人宏治間以監生任河曲縣知縣有吏材
修舉廢墜百度一新而噢咻疾苦尤至調嵐縣擢均州知
州以禦流寇功遷河東鹽運司副使祀名宦

周山紹興人宏治間以舉人任保德州知州立心正大處事
公勤士依民懷治行爲當時最考滿當遷州人霍升等走
京師請加銜仍知州事祀名宦

李澤歷城人正德間以舉人任保德州知州澤先官沔縣晉
忻州及蒞保德興除利病不遺餘力民皆愛戴武宗幸山

西糧餉不給澤奉部院檄召買唐家會未旬日得米三百石草十萬束公用充足中外賴之後以疾求去送者載道祀名宦

王鍵永平人正德間知河曲縣廉介有幹畧善於事親母以事督責怡然受之民皆感服以績最調陽曲歷西安同知王汝安邠州人正德間由襄陽判擢保德州知州勤於政不遑寧處修城垣學舍建八蜡廟復修惠民井石橋以濟民之病渴病涉者遇旱禱雨輒應陞本府同知

王紘山東陵縣人正德間以舉人任河曲縣知縣清正能自立以不納賄逆瑾罷官瑾誅御史解冕抗疏白之起知山陰縣祀名宦

藍雲錦衣衛人嘉靖間知保德州開水渠砌石城胥有碑記

陞本府同知

齊恩陝西隆德人嘉靖中以鳴贊任河曲縣知縣外明內寬廉辨中濟以仁恕敵入犯恩揚兵河東多設旗幟金鼓之聲不絕敵大驚急卷甲去乃整船筏拯民之避兵者皆得濟事聞遣官賚之祀名宦

郝九齡高陵人嘉靖問河曲典史勤介自勵當修築邊牆時散帑十萬鎔銖不少苟歷任八年以防秋有功朝廷賜金褒異之

王世臣太原人嘉靖間任灰溝營守備套寇自陝西潰邊入犯世臣率其弟遇之於水橋峽衆謂衆寡不敵宜稍退以避其鋒世臣不聽奮勇直前兄弟同死于敵千總李虎亦力戰歿後七年寇自唐家會入把總徐堯臣率衆奮擊面

中六矢身被七創猶鏖戰不退遂歿于陣

胡棣字棟隆陝西洵陽人萬歷中以選貢任夏縣知縣遷保德州知州殫心民事百廢具舉在保德州修城垣立社倉闢養濟院惠民局修文廟製祭器繪祭儀圖補經籍數十部立社學延師訓童蒙輯州志坊表舖舍監獄悉修舉後陞鄖陽同知將去老幼焚香送者百里不絕建生祠四十餘處

高應科邢臺人萬歷間以舉人知河曲縣操履清潔衣食如貧生屢經薦剡在任三載以憂歸百姓遮道泣送如失慈母

韓朝貢膚施人萬歷間以舉人任保德州知州貌甚樸有揮霍材嘗請銷絕軍蠲河糧力與上官抗卒如其議又以州

爲邊陲邑城垣尤重倡衆斃其四面朝貢先官嵐縣嵐縣人謳思之至是州人亦建祠祀焉

王甲號劍塘利津人萬歷間以舉人任保德州知州甲先任大同通判有廉能聲及涖州益厲清操剖決是非片言悉得黠者至不敢吐一辭後擢夔州府同知祀名宦

黨傑陝西城固人萬歷四年以進士知河曲縣溫厚縝栗馭豪猾甚嚴而噢咻小弱則倍極仁恕持身廉潔正供外絲毫無所取三年如一日尋以艱歸後補文安縣行取監察御史

周鴻圖山東卽墨人崇禎間由明經以軍功歷升叅政強毅有大畧流賊久據城不下鴻圖統川貴兵進勦同事首鼠不前鴻圖曰兵貴拙速未聞巧遲乃直抵城下據賊水道

與戰大敗之八日城遂下卽任岢嵐道以縣城被賊瘡痍
屢發賑粟有收難婦者悉令還之一卒抗令卽斬以徇邊
境得安

崔從教北直遷安人由鄉進士除太原令崇禎間巡撫宋統
殷援勦流賊檄從教司餉隨署縣事時城甫下路將李春
芳縱兵大掠公力禁得止又念賊病渴潰城恐賊亦以渴
制我遂建議築水城兵荒後飢疫大行請賑蠲租全活甚
衆河民德之

秦樂天三原人崇禎間以進士知河曲縣時當兵燹際士庶
一日數驚樂天百計撫綏申築水城尤加意學校陞戶部
主事

解州

周

徒師沼魏大夫說苑魏太子語經侯徒師沼治魏而市無預賈

田文魏相也吳起不悅謂文曰請與子論功可乎文曰可起曰將三軍使士卒樂死敵國不敢謀子孰與起文曰不如子起曰治百官親萬民實府庫子孰與起文曰不如子起曰守西河而秦兵不敢東嚮韓趙賓從子孰與起文曰不如子起曰此三者皆出吾下而位加吾上何也文曰主少國疑大臣未附百姓不信方是之時屬之於子乎屬之於我乎起默然良久曰屬之子矣文曰此乃吾所以居子之上也起乃自知弗如文文既卒公叔爲相尚魏公主而害起公叔之僕說公叔讒起起奔楚